

Inuussutissarsiummik ingerlataqarneq pillugu Inatsisartut inatsisissaannut siunnersuut
(Inuussutissarsiornermut Aatsitassaqaqarnermullu Naalakkersuisuni ilaasortaq)

Saqqummiussinermut allakkiaq
(Inuussutissarsiornermut Aatsitassaqaqarnermullu Naalakkersuisuni ilaasortaq)

Siullermeenera

Matumuuna inuussutissarsiummik ingerlataqarneq pillugu Inatsisartut inatsisissaannut siunnersuut saqqummiutissavara.

Siunnersuutip Naalakkersuisut suliniutinut angisuunut atugassiap ilaatut isigineqassaaq, taakku tamarmiullutik Kalaallit Nunaannut aatsitassarsiorfiusumi aamma erngup nukissiornermik atuineq tunngavigalugu tunisassiornermut nunanit allaniit aningaasaliisartunut unammillersinnaanerutilissavaa. Namminersortoqarfimmi pisortaqaqfimmilu unammillernerup tunisassiorsinnaanerullu siuarsarnissaat siunnersuummut siunertaavoq.

Inuussutissarsiummik ingerlataqarneq pillugu inatsimmi aalajangersakkat annertuumik pisariillisarfiginerinik, ilutigalugulu siunnersuummik atuiffiusoqarfik siunissami taamaallaat atugassanik pisiassanik tunisinermuinnaq atuutsilernissaanik siunnersuutip nassatarissavai.

Atuisunik illersugaqarneq isumannaarniarlugu niuertuusup tamatigut suliffeqarfiup GER-nr.-anik aammalu piginnittup aqqanik najugaanillu erseqqissumik allagartaliisarnissaa, kiisalu piumasaqartoqarneratigut paasissutissat taakku niuertumut tunniuttassagai siunnersuutaavoq.

Aallaavigisatut niuertoqarneq niuerfimmit aalajangersimasumit pisarneranik piumasaqaat atorunnaarsinneqassaaq.

Siunnersuut inuussutissarsiorfimmu aningaasaqarnikkut allaffissornikkullu iluartunik kingunissaqassasoq nalilerneqarpoq. Niuernikkut najoqqutassanut nutaanut ammaasoqarpoq, soorlulusooq niuerfeqarfinnut aamma saqqummersitsisarfinnut il.il. atatillugu inuussutissarsiorlutup nioqqutissanik tunisaqarnissamik kissaateqaruni suliat isumagisarneri pisariissarneqalerlutik. Ullumikkut tunisisariaatsit aalajangersimasumik annertussuseqartumik pisareersut inuussutissarsiummik ingerlataqarneq pillugu inatsisip killingititaasa iluini pisinnaassanerinik siunnersuut periarfissiivoq, ilanngullugit toqqortaatinik sivikitsumik tunisaqartarnerit, home-parties allallu.

Akileraarutunik akiliinermik nakkutilliinerup isumannaarneratalu ingerlanneqarnissaanut tunngatillugu pisortaqaqfiit nalunaarsuisoqarnissamik pisariaqartitaat inatsisiliatigut allatigut

isumannaarneqarsimapput. Taamaalillutik suliffeqarfiit ullumikkut GER-imi nalunaarsuiffimmi aamma sulisitsisut nalunaarsuiffianni nalunaarsorneqareertassapput.

Inuussutissarsiummik ingerlataqarneq pillugu inatsisip atugaqarfigisaata taamaallaat namminersuutigalugu nioqqutissat atugassatut pisiassat nioqqutiginerini inuussutissarsiornermuinnaq tunngatilenissaanik siunnersuuteqarnikkut inuussutissarsiummik ingerlataqarneq pillugu inatsimmi aalajangersakkat arlallit pisariaarutissapput. Inuussutissarsiorfinnut assigiinngitsunut taakkulu pisariaqartitaannut assigiinngitsunut immikkut ittumik tunngatitanik malittarisassianik aalajangersaanikkut tulluarnerusumik erseqqinnerusumillu aalajangersaaneq pisinnaasoq naliliiffigineqarpoq. Kalaallit Nunaanni niuerfeqarfimmut attaveqarnissamik inuussutissarsiummik ingerlatsineq pillugu inatsisaasup siammasissup atuuttuusup killeqartitsisunik piumasaqaatinik inissitsiterisup unammillertoqarneq killilersorpaa akit inissisimaffiannik qaffasinnerusumik nassataqartitsilluni. Tamatumalu inuussutissarsiorfiusumik matoqqasumik pilersitsivoq, akit pillugit isumaqatigiissuteqartarnernik aamma akit pillugit isumaqatigiissutinik unammillernermik killiliisunik inerteqqutaasunik tunngavissiilluni, ajoraluartumik ilungersornartunik pisimasutut takusimasatsinnik inuiaqatiginni aningaasaqarnermut ajoqutaasunik.

Aalajangersimasumik sivilissusilimmik inuussutissarsiuini sulianik ingerlatsiniartunut suliffeqarfiit nunanit allaneersut immikkoortortaqaarfiisa nalunaarsornissaanik inuussutissarsiummik ingerlataqarneq pillugu inatsisip atuuttup piumasaqaateqarpoq. Nunanit allanit suliffeqarfiup immikkoortortaqaarfianik nalunaarsuinissaq tassaagajuppoq piffissamik isumalluutinillu piumasaqartitsisoq. Erhvervs- og Selskabsstyrelsimi (Inuussutissarsiuinut ingerlatseqatigiinnullu Aqutsisoqarfimmi) Kalaallit Nunaanni immikkoortortaqaarfiup pilersinnissaanut piumasaqaataasoq tassaavoq suliffeqarfimmi ingerlassat piffissami sivikinnerusumi ingerlassanit ataasiakkaanut naleqqiullugit annertunerunissaat. Tassani ullumikkut inuussutissarsiummik ingerlataqarneq pillugu inatsisip atuuttup aamma ingerlatseqatigiinnut inatsisaasut akornanni akerleriissutaasinnaasoq inissisimareerpoq.

Suliat aatsitassaqaarnermut inatsit naapertorlugu akuersissummik nalunaarutaasumik tunngaveqarluni suliarineqartut inatsisaasut atuuttut naapertorlugit inuussutissarsiummik ingerlataqarneq pillugu inatsisip atuuffianut ilaatitaasuunngereerput. Tassanngaanniit misilittakkat paatsuungassaangitsumik iluarinartuusimapput. Cairnip uuliasiorluni qillerinerani nunanit allanit suliffeqarfiit assigiinngitsut 50-it tungaannut amerlassusillit peqataapput. Suliffeqarfiit taakku tamarmik immikkoortortaasa nalunaarsorneri assorsuaq piffissamik isumalluutinillu atuiffiusimasussaagaluarpoq, qillerinissanillu kinguarsaasinnaasimallutik.

Aamma inuussutissarsiummik ingerlataqarneq pillugu inatsimmi immikkoortortanut piumasaqaataasoq aamma aatsitassarsiornermut inatsimmi Kalaallit Nunaanni suliffeqarfiviusutut paasininnissamut piumasaqaataanik sanngiillisaanermik nassataqassaaq, aatsitassaqaarnermut inatsit naapertorlugu ingerlaqqissalluni, najugaqarfimmi immikkoortortaqaarfimmik ingerlatsisumit sinniisuutitaqaannarani. Inuussutissarsiummik ingerlataqarneq pillugu inatsisip immikkoortoaarfinnut aalajangersagaasa

akunniliuttoqartitsineq periarfissippaa, Kalaallit Nunaanni suliffeqarfinnik peqataatsitsivinnissaq isumannaarnagu.

Inuusuttortatsinnut najugaqarfimmi suliffeqarnissanik sungiusartarfissanillu annertusaanissamut iliuitsit siuarsarnissaat kissaatigigutsigit allanik aammalu sunniteqarluarnerusunik periuseqarpoq, inuussutissarsiummik ingerlataqarneq pillugu inatsisikkut illersuiniarneq aqutugalugu inuussutissarsiorfiup unammillernermut illersuinnarnissaa pinnagu.

Assersuutigalugu pisortat sanaartugassanik neqerooruteqarnerini najugaqarfimmi suliffeqarnissamik sungiusartarfissanillu neqerooruteqarnermi piumasaqaatinngortinnerisigut misilittagaqarluartoqarsimavoq. Aatsitassarsiorfiusumissaaq ilaatigut najugaqarfinni suliffeqarfinnik ilanngussinerit aammalu najugaqarfimmi sulisut piginnaanngorsarnissaannut pikkorissartitsinernik neqeroorutit pillugit anguniagaqarfiusunik IBA-mi isumaqatigiissuteqarnermi piumasaqaateqarnikkut pitsaasunik, piviusunik inerniliissutit anguneqarsimapput.

Taamatut oqaaseqarlunga siunnersuut Inatsisartuni akuersaartumik oqaluuserinissaanut ingerlateqqissavara.